

Communicaziun a las medias dal Cussegl dal public SRG.R

Il «Profil» da RTR cun Urs Cadruvi n'ha betg violà il princip publicistic da l'equiliber

Cuiria, ils 10-07-2017 – Il post da mediaziun da la SRG.R ha tractà la reclamaziun ch'è vegnida inoltrada suenter l'emissiun «Profil» emessa ils 20 da matg 2017 en il Radio Rumantsch. Curt avant che Urs Cadruvi ha bandunà ses post sco secretari general da la Lia Rumantscha ha Radiotelevision Svizra Rumantscha (RTR) envidà el ad in discours. Suenter l'emissiun ha RTR survegnì differentas reacziuns da personas ch'èn sa resentidas en spezial da la furma – tenor ellas – confrontativa co la moderatura ha fatg l'intervista. Tut las personas ch'èn sa drizzadas en chausa directamain tar RTR han survegnì ina resposta.

Encunter l'emissiun è era vegnida inoltrada ina reclamaziun tar il post da mediaziun da la SRG.R. Il mediatur Toni Hess ha tractà quella, e constatà che l'emissiun na surpassa betg il princip publicistic da l'equiliber. Medemamain constatescha il mediatur, che Urs Cadruvi ha durant l'emissiun già la pussaivladad da prender posiziun e da responder a tut las dumondas da la moderatura ed als arguments da las personas che han exprimì en l'emissiun critica che pertutga sia lavur durant il temp sco secretari general da la Lia Rumantscha. Sut questas circumstanzas vegn il mediatur era a la conclusiun, ch'il princip da l'equiliber è vegnì resguardà commensuradamain e che auditors ed auditurs han già la pussaivladad da furmar in'atgna opiniun. Il mediatur scriva dentant era ch'il fatg che la moderatura n'ha betg fatg ina introducziun dal «Profil» cun Urs Cadruvi, explitgond il motiv pertge ch'ella ha elegì in stil offensiv, sco betg professional.

En sias explicaziuns renda il mediatur attent al fatg, ch'il post da mediaziun ha la funcziun dad examinar sche l'emissiun violescha ina ordinaziun da la Lescha da radio e televisiun (LRTV). Quai fa el cun resguardar l'autonomia da program da RTR. Il post da mediaziun n'ha cun auters plets nagina cumpetenza da decider e dar instrucziuns. El sa sulettamain intermediar tranter las partidas e rapportar da sias conclusiuns (art. 93, al. 1 e 3 LRTV).

Sche la resposta dal mediatur na cuntenta betg, ha la persona ch'è sa drizzada ad el la pussaivladad da s'adressar a l'autorità independenta da recurs davart radio e televisiun a Berna.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87